

Protocol no. 56**Sezzüda da marcurdi, als 27 favrer 2013 20.00 - 22.45**

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Marco Fallet (protocol)

Protocol

Il protocol no. 55 da la sezzüda da gövgia, als 14. Februar 2013 vain approvà.

477 790.501 Proget planisaziun cumünala
Cumischiun – propostas per müdaziuns da la ledscha da fabrica

La cumischiun da planisaziun s'ha occupada, tanter oter eir, da la problematica a regard lobjias e suottametta al Cussagl propostas chi dessan lura gnir integradas illa revisiun da la ledscha da fabrica. Quellas vegnan uossa examinadas ed a temp ütil gnarà lura la fatschenda suottamissa al suveran.

478 021 FABRICA
Permiss Uina SA, Ramosch / explotaziun da gierra Panas-ch Sura

La dumonda es statta publichada d'ürant 30 dis in cumün (Mas-chalch). Il permiss davart dal BAB ais avantman. La fatschenda nun ais però amo madüra pella decisiun, uschè cha quella vain suspaisa.

479 021 FABRICA
Andri Mosca / foura geotermica, Curtin Sura, parcella nr. 332

L'acconsentimaint davart l'uffizi per la natüra e l'ambiant ais avantman, uschè cha'l Cussagl conced'el permiss da fabrica.

480 217.503 Chasa da scoula
Proget da sanaziun

Surdatta da las lavuors da proget

Il Cussagl decida da surdar las lavuors per üna prüm'etappa dal 2013 a Seraina Felix-Gallmann, quai seguond l'offerta d'architect, plafunada sün fr. 30.000.00.

Destinaziun d'üna cumischiun da fabrica

I stuvevan esser rapreschantats in quella il cussagl da scoula, la magistraglia, il Cussagl cumünal, il manader tecnic ed üna da las personas chi d'eiran involucadas illa procedura da la concorrenza dal proget, la quala vaiva guadagnà Seraina Felix.

Davo la discussiun destinesch'il Cussagl a las seguaintas personas in quella cumischiun:

1. Andri Poo, president
2. Andri Gritti, rapresch. da la magistraglia
3. Christian Poo, manader tecnic
4. Jon Cantieni, rapresch. dal cussagl da scoula
5. Chasper Alexander Felix, anteriur commember da la giuria dal proget

Contrat cun Seraina Felix

Il Cussagl repass'ìl sböz pel contrat cun Seraina Felix pertoccant tuot il proget. Quel as basa süllas normas tenor SIA e vain repassà. Alchüns puncts vegnan amo sclerits.

481 217.314 Mantegnimaint chasa da scoula e piazzas Lavuors da mantegnimaint / abitaziun dal pedel

Ill'abitaziun dal pedel da la chasa da scoula sun davantadas necessarias alchünas lavuors da mantegnimaint. Seguond offerta pretaisa, s'amuntan ils cuosts per lavuors da reparaturas (cuschina, fanestras e gommas da fanestras) a fr. 3'700.00. Il Cussagl conceda quel credit da fr. 4'000.00.

482 805.501 Meglioraziun Dumonda al cumün a regard ün impraist

Per pudair finanziair las lavuors conclusivas dal proget Meglioraziun generala manc'a la società da miglioraziun la liquidità. Quella bsögna a cuorta vista munaida ed ils respunsabels han inoltrà la dumonda al Cussagl per ün impraist da fr. 400'000.00 davart dal cumün. I's tratta d'ün impraist a cuorta vista pella dürada da var ün on, fin cha l'ouvra ais conclusa e gnarà lura insomma surdatta al cumün. Cun quai cha güst actualmaing cula la somma da l'Energia Engiadina da fr. 2,3 miu. ed ultra da quai sto eir güst gnir prolungà ün credit fix chi scrouda, füss quai pussibel al cumün da spordscher man a la società da miglioraziun in tilla dond la pussibilità da far adöver d'ün fit blerun plü bass, dimena quel cha'l cumün sto pajar a la banca. Pel cumün nu nascha ingün disavantag.

Il Cussagl decida da conceder l'impraist da fr. 400'000.00, cun ün fit da 0,8%, in basa dal survart circumscriit. Il Cussagl ha scleri culla cumischium sindicatoria, schi bsögna in quist cas la procedura seguond costituziun cumünala, dimena cha la dumonda stuvess gnir suottamissa a la cumünanza d'urna. Cun quai chi's tratta be d'üna scuntraziun interna tanter cumün e soc. da Meglioraziun e cha pro'l schogliamaint da l'ouvra vain quel credit amortisà e va lura via in mans dal cumün, nun ais quel pass bsögnaivel. I vain stipulà ün contrat d'impraist tanter cumün e soc. da miglioraziun.

483 300.365 Contribuziuns e donaziuns / Promoziun da la cultura Dumonda da sustegn pel simposi da sculpuors a Sur En

In vist'al simposi 2013 dumondan quels per ün sustegn sco sco sponsur. Il Cussagl decida d'aderir a la dumonda e quai culla somma adequata da fr. 500.00. Quella s'inclegia sco sustegn in munaida, obain lura eir in lavur o material.

485 620 VIAS E PLAZZAS Ordinaziuns da trafic, comunicaziun publica

La fatschenda d'eira publichada i'l Mas-chalch e dürant quel temp (30 dis) nu sun entradas ingünas protestas.

I's tratta da seguainta limitaziun

limitaziun da larghezza maximala 2,3m (sig.2.18),

sün la via champestra Spinatscha – Chanals, Sent (Feldweg)

müdada dal decret dal departamaint dals 11 avuost 1980, “pais maximal 9 t” (sig. 2.16)

Il pais maximal sülla via champestra Spinatscha – Chanals, territori cumünal da Sent, vain dozà da 9 tonnas sün 18 tonnas

Il Cussagl decidda da publicar quista masüra eir i'l fögl uffizial dal chantun Grischun. Men Caviezel, cusglier dal dicasteri, orientescha cha pro sia persuna sajan gnüdas inoltradas alchünas dumondas in chosa, las qualas el ha pudü sclerir. Veiculs agriculs cun üna sveltezza maximala da 40 km/h, chi surpissan la larghezza da 2.30m pon transir, però quels bsögnan ün permiss excepziunal (p.ex. veiculs agriculs per effeuar lavuors per terzas persunas). Veiculs agriculs cun üna sveltezza maximala da 40 km/h e cun üna larghezza maximala da 2.55 m pon eir transir sün vias limitadas cun üna larghezza max. da 2.30 m.

487 622

GRUPPA DA MANTEGNIMAIN

Problematica mancanza da persunal / proposta dal profil da pretaisas e pella publicaziun d'üna piazza da lavur

La tractranda vain suspaisa, causa chi ston amo gnir fats ulteriurs sclerimaints.

489

DIVERSAS SCHEFS

Cumischiun d'energia

La cumischiun as cumpuona dal vicecapo, Andri Poo, da Men Caviezel e da l'anteriuor Capo, Jon Carl Rauch. Quella metta uossa insembel ils progets previs, chi gnaran lura suottamiss a temp ütil al Cussagl.

Shuttle bus – evaluaziun dal mais favrer / ulteriur proceder

Il Cussagl vaiva decis da far ün mais da prova e quai d'ürant il mais da favrer. A la dumonda, scha quel temp dess uossa amo gnir prolungà per duos eivnas nun aderischa il Cussagl. A regard la valütaziun supra ils rebombs dals utilisaders dal bus gnarà amo orientà a temp ütil.

490

ORIENTAZIUNS

Proget da fusiun / invid ad üna sezzüda / 13 marz 2013 a las 19.30 (Bogn Engiadina, Scuol)

L'uffizi per cumüns dal Grischun invida als Cussagls da tuot ils cumüns d'Engiadina Bassa ad üna discussiun a regard il proceder in vist'a la dumonda dal cumün da Guarda sco eir ils impuls davart ils cumüns da Lavin e Susch. Tuot il Cussagl cumünal prevezza da far part.

Armon Nuotclà / survaglianza da las sendas

Armon Nuotclà as ha declerà pront sün dumonda, da surtour la survaglianza da las sendas da nos cumün. Da quai vain tut cugnuschentscha cun satisfacziun. Il Cussagl ingrazcha eir sün quista via ad Armon pella prontezza d'avair surtut quella lezcha.

491

VARIA

Il cusglier dal dicasteri da god, orientescha cha'l silvicultur saja gnü dumondà da s'ingaschar sco instructor per ün cuors da giarsuns ad Ambri. Il scopo ais, ch'ün instructor saja

croud'oura e chi nu's chatta be güst a cuorta vista üna persuna chi ha eir cugnuschentschas da la lingua taliana. Il cuors cumpiglia l'installaziun dal fil per laschar giò laina ed as splaja dals 15 fin als 26 avrigl. Nos silvicultur s'ha declerà pront da spordscher man. Da quai vain tut cugnuschentscha ed il Cussagl va d'accord in fatschenda. L'ingaschamaint dal silvicultur vain natüralmaing indemnisa al cumün.

Las fatschendas nr. 484 / 486 e 488 nu vegnan publichadas, causa cha quellas suottastan al secret d'uffizi.